

Na osnovu člana 4. Odluke o načinu raspoređivanja finansijskih sredstava iz Budžeta Grada Tuzla neprofitnim organizacijama po LOD metodologiji („Službeni glasnik Grada Tuzla“, broj 1/19, 7/20, 5/21, 4/22, 2/24 i 3/25), u skladu sa tačkom 12. Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“, broj 15/18) i Budžetom Grada Tuzle za 2025. godinu („Službeni glasnik Grada Tuzla“, broj 3/25 i 4/25), Služba za ekonomski razvoj, poduzetništvo i poljoprivredu Grada Tuzle, donosi

P R O G R A M

utroška sredstava iz Budžeta Grada Tuzle za 2025. godinu sa pozicije-Grant organizacijama iz oblasti poljoprivredne proizvodnje

Član 1.

Programom utroška sredstava iz Budžeta Grada Tuzle za 2025. godinu sa pozicije-Grant organizacijama iz oblasti poljoprivredne proizvodnje (u daljem tekstu: Program), određuju se prioritetni pravci, korisnici sredstava, prihvatljive aktivnosti u projektima koje će aplicirati potencijalni učesnici u javnom pozivu, te minimalan i maksimalan iznos podrške po projektu, kao i druga pitanja u vezi s načinom utroška sredstava iz ovog Programa koja se dodjeljuju neprofitnim organizacijama na projektnoj osnovi, kandidovanjem projekata putem javnog poziva.

Član 2.

Opći cilj ovog Programa je jačati partnerstvo između neprofitnih organizacija i Grada Tuzle, odnosno izgradnja svijesti o koristi međusobne saradnje i podsticanja održivog dijaloga, u funkciji unapređenja i razvoja sektora poljoprivrede, bitne komponente ukupnog razvoja grada Tuzle, u interesu poljoprivrednih proizvođača, krajnjih korisnika prema kojim će biti usmjerene aktivnosti kandidovanih projekata.

Aktivnosti projekata koji se mogu kandidovati za učešće u raspodjeli sredstava iz člana 1. ovog Programa moraju biti vezane za oblast poljoprivrede, koja predstavlja jednu od prioritetnih oblasti u smislu Odluke o načinu raspoređivanja finansijskih sredstava iz Budžeta Grada Tuzle neprofitnim organizacijama po LOD metodologiji („Službeni glasnik Grada Tuzla“, broj 1/19, 7/20, 5/21, 4/22, 2/24 i 3/25), (u daljem tekstu: Odluka).

Član 3.

U Budžetu Grada Tuzle za 2025. godinu, u dijelu Službe za ekonomski razvoj, poduzetništvo i poljoprivredu (u daljem tekstu: Služba), na poziciji-Grant organizacijama iz oblasti poljoprivredne proizvodnje (ekonomski kod 614311/17) planirana su sredstva u iznosu od 20.000,00 KM i bit će raspoređena za podršku projekata koje će putem javnog poziva aplicirati neprofitne organizacije koje su prema ciljevima osnivanja i programskim aktivnostima pretežno usmjerene na oblast poljoprivrede.

Prema DOB-u Grada Tuzle za period 2025 – 2027 godina planirana sredstva na ovoj poziciji godišnje iznose po 20.000,00 KM.

Planiranje budžetskih sredstava na predmetnoj poziciji povezano je sa Strategijom razvoja grada Tuzla za period do 2026. godine, u okviru 1. strateškog cilja - Povećati konkurentnost privrede, sektor: lokalni ekonomski razvoj, podsektor: poljoprivreda i ruralni razvoj, podsektorski cilj: unapređenje poljoprivrede i ruralnog razvoja kroz razvijanje konkurentne i održive integralne poljoprivredne proizvodnje.

Član 4.

Projekti prihvatljivi za podršku iz sredstava ovog Programa treba da su usmjereni na prioritetna područja odnosno podoblasti u okviru prioritetne oblasti - poljoprivreda, definisane Odlukom iz člana 2. ovog Programa, kroz sljedeće aktivnosti: pružanje podrške poljoprivrednim proizvođačima u edukaciji, zastupanju interesa poljoprivrednih proizvođača, podizanje nivoa svijesti o poljoprivrednoj proizvodnji, razvoju i očuvanju seoskih područja, zatim na unapređenju plasmana poljoprivrednih proizvoda, promociji domaće poljoprivredne proizvodnje i mogućnosti ruralnog razvoja. Navedene aktivnosti treba da se u skladu s ciljevima rada i osnivanja ovih organizacija.

Član 5.

Pojedinačna podrška projekata iz sredstava ovog Programa može iznositi od 1.000,00 do 5.000,00 KM.

Projekti se mogu sufinansirati iz vlastitih sredstava organizacija-potencijalnih učesnika u javnom pozivu i/ili iz sredstava osiguranih od drugih donatora.

Sredstvima koja će se dodijeliti u okviru javnog poziva za raspodjelu sredstava ovog Programa mogu se finansirati administrativni troškovi korisnika dodijeljenih sredstava, pod kojim se podrazumijevaju: troškovi osoblja, uredski troškovi i troškovi putovanja i prevoza, u maksimalnom ukupnom iznosu do 20% odobrenog iznosa.

Sredstva ovog Programa neće se rasporediti u cijelosti ukoliko po javnom pozivu ne bude zaprimljen dovoljan broj kvalitetnih projekata odnosno projekata koji zadovoljavaju kriterije utvrđene Odlukom iz člana 2. ovog Programa.

Projekti aplikacija treba da se sastoje od nezavisnih operativnih aktivnosti (različitih oblika podrške), sa jasno formulisanim operativnim ciljevima, ciljnim grupama i planiranim ishodima, kojima će se odgovoriti na specifične potrebe lokalne zajednice i doprinijeti ostvarivanju ciljeva ovog Programa.

Aktivnosti projekata koje će prijaviti neprofitne organizacije putem javnog poziva za raspodjelu sredstava ovog Programa moraju biti realizovane na području grada Tuzle.

Član 6.

Putem javnog poziva za raspodjelu sredstava ovog Programa projekte mogu prijaviti zainteresirane neprofitne organizacije koje pretežno djeluju u oblasti poljoprivrede, koje aktivno rade na pružanju podrške poljoprivrednim proizvođačima, na stvaranju uslova za razvoj i unapređenje sektora poljoprivrede na području grada Tuzle, koje posjeduju odgovarajuće kadrovske i tehničke pretpostavke i prethodno iskustvo za kvalitetnu realizaciju projekata u navedenim područjima s krajnjim ciljem pružanja podrške poljoprivrednim proizvođačima, krajnjim korisnicima kandidovanih projekata, čije aktivnosti doprinose rješavanju jednog ili više prioriteta utvrđenih u članu 4. ovog Programa. Projekti će se kandidovati putem javnog poziva koji će objaviti Služba u okviru koje su pozicionirana sredstva ovog Programa.

Član 7.

Odredbe ovog Programa primjenjuju se na postupak raspodjele sredstava predviđenih u Budžetu Grada Tuzle za 2025. godinu, na poziciji-Grant organizacijama iz oblasti poljoprivredne proizvodnje (ekonomski kod 614311/17), namijenjenih za dodjelu neprofitnim organizacijama iz oblasti poljoprivrede na ime podrške projekata kandidovanih putem javnog poziva.

Član 8.

Ovaj Program stupa na snagu danom donošenja i ne objavljuje se u „Službenom glasniku Grada Tuzla“, a objavit će se na službenoj internet stranici Grada Tuzle.

Dokument pripremila: Dijana Dizdarević.

Broj: 04/11-10952/2025
Tuzla, 10.07. 2025. godine

Pomoćnik gradonačelnika
za Službu za ekonomski razvoj, poduzetništvo i poljoprivredu

Alma Halilović, dipl.ecc.

